

DISSERTATIO  
 INAUGURALIS,  
 DE CASTOREO:

QUAM,

ANNUENTE SUMMO NUMINE,

*Ex auctoritate reverendi admodum viri*

D. GULIELMI WISHART S. T. D.

ACADEMIÆ EDINBURGENSIS PRÆFECTI,

NEC NON

*Amplissimi SENATUS ACADEMICI consensu, et  
 nobilissimæ FACULTATIS MEDICÆ decreto;*

PRO GRADU DOCTORATUS,

SUMMISQUE IN MEDICINA HONORIBUS ET PRIVILEGIIS  
 RITE ET LEGITIME CONSEQUENDIS,

ERUDITORUM EXAMINI SUBJICIT

TIMOTHEUS TAPPS BUCK, Anglo-Britannus.

Ad diem 6 Julii, hora locoque solitis.

*In tenui labor* ————— *VIRG.*

EDINBURGI,

Apud R. FLAMINIUM. M.DCC.LII.

Digitized by the Internet Archive  
in 2019 with funding from  
Wellcome Library

<https://archive.org/details/b30783719>

V I R O C L A R I S S I M O  
D. C A R O L O A L S T O N,  
M E D I C I N Æ, B O T A N I C E S,  
E T  
M A T E R I Æ M E D I C Æ,  
A P U D E D I N E N S E S  
P R O F E S S O R I,

ob universæ, quæ rei medicæ infervit,

Scientiæ Naturalis cognitionem,

summâ cum facilitate

ac morum probitate conjunctam,

meritò insigni ;

P R O L U S I O N E M H A N C I N A U G U R A L E M,

magnâ erga Eum

animi promptitudine fretus,

D I C A T

T I M O T H E U S T A P P S B U C K.





# DISSERTATIO INAUGURALIS

D E

## C A S T O R E O.

CUM universi ferè, qui genus humanum affligunt, morbi, à medicinæ studiosis, qui in hac Academiâ pro gradu doctoratûs disputârunt, tractati sint; mihi de remedio haud ignobili, è regno, quod dicitur, animali petito, sciz. CASTOREO, pauca proferre visum est.

CASTOR est animal quadrupes, inter rerum naturalium scriptores pro amphibio habitum; cujus longitudo à summis naribus ad extremam caudam pedes tres cum dimidio, latitudo uncias duodecim æquare, pondusque libras triginta superare, dicitur \*. Pili, tam longitudine, quàm colore diversi, corpus totum integunt. Cauda, quâ ad captandos pisces aquas secat, sine pilis est, pisciumque squamas refert. Pedes quidem anteriores caninis pedibus, posteriores verò anserinis similes sunt.

A

LUSTRA

\* RAII synopsis animal.

## 2 DISSERTATIO INAUGURALIS

LUSTRA ad fluminum ripas, viz. GALLIÆ, GERMANIÆ, ac POLONIÆ sita, CASTORES incolunt. Fructus autem varii generis, atque arborum cortices depascunt. Omnia enim hæc in ventriculis, inter diffecanda eorum corpora, inventa fuerunt. De animalium horum solertiâ, præsertim quòd domos sibi affabrè inprimis construunt, mira quædam ac fide majora traduntur. Qui de his tamen plura velit, auctores infrà citatos adeat \*. Hæc de animalis historiâ sufficiant, nunc de CASTOREI ortu dicendum est.

Duo folliculi, liquore oleagino, coloris cineritii et foetidi odoris, repleti, in inguinibus horum animalium positi sunt. Magnæ circa hos inter viros doctissimos agitantur lites; alii enim testiculos, alii glandulas odoríferas esse volunt. Anatomia vero glandulas esse duas detexit, quæ tam in maribus, quàm in foeminis, utrinque in inguinibus conspiciuntur †. Quod autem, de CASTORIBUS eos morfu auferentibus, cùm venatores illos persequerentur, olim traditum fuit ‡, id ab omnibus pro fabellâ anili jam deridetur.

HIS

\* Vide POMET's *history of drugs*. *Nature delin.* vol. I. p. 220.

† DALEI pharmacolog. p. 408.

‡ “ Et pedibus segnis, tumidâ et propendulus alvo,

“ Hac tamen infidias effugit arte Fiber.

“ Mor-



HIS folliculis abscissis, atque in umbrâ aut camino suspensis, liquor, quo impleti sunt, indurescit; manente interim foetido odore, et colore cineritio. Substantia hæc CASTOREUM dicitur, quod è variis deportatur regionibus exteris, viz. POLONIA, RUSSIA, atque INDIS utrisque: RUSSICUM verò ab omnibus materieï medicæ scriptoribus optimum habetur.

CASTOREUM verum non nisi magno paratur pretio: hinc Pharmacopolæ nonnulli, lucro inhiantes, fraudem faciunt emptoribus; Gummi enim Ammoniaci pulverem, cum CASTOREO commixtum, vesiculis indunt, et pro vero venditant. Impurum verò à puro facile distinguitur; quoniam illud coloris nigri est, et mucidum, et minùs friabile; hoc autem odoris foetidi, saporis acris, et naturæ admodum friabilis.

CASTOREI acris sapor, odorque foetidus, multum fallis volatilis in se contineri satis demonstrant. Odor hic non tantum superficie tenus, sed per totum dispersus inhæret:

- “ Mordicùs ipse sibi medicata virilia tollit,
- “ Atque abjicit sese gnarus ob illa peti.
- “ Hujus ab exemplo disces non parcere rebus,
- “ Et vitam ut redimas hostibus æra dare †.”

† Vide TOPSAL's *history of animals*.

#### 4 DISSERTATIO INAUGURALIS

hæret: cùm vèro odor à particulis salinis et volatilibus fortiter olfactûs organum ferientibus, dependeat, salem CASTOREI quoque calidum esse nemo sanæ mentis negabit; hinc concludendum est, CASTOREUM esse calidum \*.

UNDE, CASTOREUM sequentes possidere vires satis evidens erit, sciz. attenuandi, aperiendi, flatusque discutiendi. Spiritus simul animales languidos excitat; venenis resistit; et potentiam anodynam in se continet. OPII insuper virulentiam hoc medicamine corrigi posse dicitur. Hinc in Apoplexiâ, Epilepsiâ, Paralyfi, Surditate, et Colico dolore, morboque Hysterico, atque Hypochondriaco, Febribusque systema nervosum vexantibus multùm valet CASTOREUM. Ob illud sal volatile inprimis totum genus nervosum solatur; morbos uterinos, motus inordinatos corrigendo atque sistendo, depellit; Vertiginosis, Epilepticiis et Apoplecticiis prodest; Colicorum tormina, aliarumque partium nervosarum evidenter lenit et tollit †. A granis tribus ad drachmam unam præscribi potest, sed rarò ultra scrupulum exhibetur.

EASDEM vires CASTOREO veteres attribuisse, ex DIOSCORIDE patet. Ille enim vim stimulandi huic medicamento

\* Vide MANGET. biblioth. pharmaceut. medica, lib. 3. p. 494.

† Vid. MANGET. ibid.



medicamento ascribit, et ad menses ciendos, et contra tremores, &c. non solum internè, sed externè proficuum æstimat. A notis simul MATTHIOLI in DIOSCORIDEM constat, GALENUM in morbis nervosis CASTOREUM exhibuisse. ARETÆUS CAPPADOX, de curatione Apoplexiæ agens, ait, miram habet vim ad resolutos CASTOREUM: atque in alio loco, morbis autem nervorum CASTOREUM medetur\*. Morbos etiam, contra quos medici atque chirurgi recentiores CASTOREUM præscribunt, enarrat ETMULLERUS; adversus enim Epilepsiam, Apoplexiam, Paralyfin, Lethargos, &c. potestatem magnam habere hoc medicamentum affirmat: quod autem ad efficaciam ejus in his morbis attinet, eam virtuti spiritus torpidos languidosque excitandi acceptam refert.

IN suffocatione sive strangulatione uteri, CASTOREUM optimos præstat usus; imò præsentissimum fit remedium: testibus hac in re vix sanè opus est, cùm mulierculæ nostræ, hac passione laborantes, ad id tanquam ad sacram anchoram confugiant†.

Ex dictis itaque patet, CASTOREUM remedium esse præstantissimum, atque à veteribus ad eosdem morbos faciendos

B

nandos

\* ARETÆUS, p. 79. et 82. † MANGET. ibid.

## 6 DISSERTATIO INAUGURALIS

nandos commendatum, contra quos præscribunt etiam recentiores.

INTER Chemicos, ad tincturam CASTOREI extrahendam, an rectificatus, an spiritus tenuis, menstruum sit optimum; et an calidâ potius, quàm frigidâ maceratione, felicissimè eliciatur vis ejus medica, disputatum fuit. Dominus verò LEWIS, qui Pharmacopœiam EDINENSEM *Anglicè* reddidit, notisque illustravit, sequens experimentum nobis exhibet. CASTOREI RUSSICI unciam unam cum dimidio in spiritûs vini Gallici lib. 1. immisit. Post macerationem viginti dierum, tinctura valdè tenuis erat, et viribus CASTOREI tantùm leviter imbuta. Effusâ hac primâ tincturâ, residuo addidit spiritûs vini rectificati lib. 1. et post digestionem paucarum horarum, tincturam alterâ generosiores habuit. Vix autem ab hoc experimento concludere licet, spiritum tenuem minùs aptum esse quàm fortem ad vires CASTOREI extrahendas. Maceratio enim spiritûs tenuis, partes CASTOREI mucilaginosas dissolvendo, ejus poros ita referavit, ut spiritûs rectificati viribus faciliùs cederet. Præterea, probabile est, spiritum tenuiorem vires CASTOREI æquè feliciter ac fortiores extrahere, quoniam plurimi medici aquam calidam CASTOREO affusam, modo THEÆ, usurpandam præscribunt; nec



nec sine successu. Cùm ergo aqua sola CASTOREI vires educere possit, non dubitandum, quin spiritus tenuis idem faciat. Atque Chemicus in arte versatissimus mihi narravit, quòd CASTOREUM, unà cum spiritu ardente è saccharo confecto, in mortario marmoreo tritum, tincturam meraciorem suppeditet, quàm si cum eodem spiritu commistum, sine tritu, leni calore digeratur.

VIREs tincturæ CASTOREI eadem sunt ac remedii ex quo paratur, sed multùm debiliores; quare CASTOREUM in substantia exhibitum, tincturæ ejus meritò longe præfertur.

F I N I S.



